



IN OBITVM
ILLVSTRISS. AC
REVERENDISSIMI
ALEXANDRI
FARNESII.

Sanctę Rom. Ecclesię Cardinalis Amplissimi.

Herculiani Monicij Presb. Parmen.

ORATIO.







AD. RAINVTIVM FARNESIVM

PARM. PLACENT. ETC.
PRINCIPEM
SERENISSIMVM.



CCVPATISSIMVM certe me habet,
SERENISSIME PRINCEPS, illud
munus, cui tua me SERENISSIMA
CELSITVDO, insigni quadam be-
nignitate impellente, praefecit : sed ta-
men, quae summa est erga tantū Prin-
cipem animi mei propensio, non potui
non tentare, si quid possem temporis, ei
muneri, sine vllō eius detrimento, sub-
trahere : quo immensum animi dolo-
rem ex re tristissima, quae accidit, susce-
ptum, re aliqua facienda, quae ad prae-
sens tempus pertineret, declararem.

Quare, nactus breuissima quaedam interualla, quibus mihi liceret
ab ea occupatione respirare; haec in ea re potissimum mihi collocan-
da esse duxi; quam occasio, licet minus grata, minus iucunda, minus
optabilis, offerret. Itaq. oratiunculam quandam in maestissimo funere Am-
plissimi Cardinalis, ALEXANDRI FARNESII; CELSITVDINIS TVAE
Patruī maioris, confeci. Hanc autem cum quadā cupiditate incensus ede-
re, atq. alicuius Patrocinio, vt fit, committere vellem; Ego me ei, qui san-
guine illi erat coniunctissimus, rectius multo, quam alij ab ea necessi-
tudine alieno, dedicaturum putauī, id quod sane facio quamlibentissime.
Spero enim munus licet tenue, & exile tuae SERENISS. CELSITVDINI

ingratum non futurum. quod immortales illius, vtcunq. collectas, laudes contineat: qui FARNESIAE gentis decus fuerit excellentissimum, nulla prorsus vel temporum iniuria obscurandum; vel hominum inuidia, silentio inuoluendum. Vereor autem, ne non satis prospere, ac feliciter ceciderit industria. Sed, vt vt ceteri de re iudicent, non laboro. illud vero maxime; vt res, licet minima, aperre indicet: meum esse erga SERENISSIMAM CELSITVDINEM tuam, sicuti certe est, multo maiore animum, quam vnquam ex eo munere, quo fungor, vere possit cognosci. Quod tamen munus ego tanti facio; vt vnum ex ijs statuam esse, quae mihi in vita possint votis animi non solum paria, sed etiam ijsdem maiora contingere. & merito quidem. Video enim Principem ijs moribus, qui non solum Principe; sed etiam Christiano Principe digni sunt, ornatissimum. deinde omnes, qui in Illustrissima eius omnem laudem vincente Aula sunt, ac versantur; Principis nutum, atq. acta assidue obseruantes, ijs tantum moribus in quibus summus honos, & summa laus eluceat, summo opere esse coonestatos: omni studio ea vitia deuittantes, quibus Principum Aulae, ni mature prouideatur, solent non sine grauissima Dei iniuria, & proborum hominum offensione, addo etiam Principum dedecore infici, & commaculari. Qua ex ratione tam praecleara, & tam laudabili consilio, quin ea, quae iam orta est laus, quaeq. quotidie augetur, clarissimum tanti Principis nomen immortalitati tandem sit consecratura, optima quaedam me non finit ratio dubitare. Quod superest CELSITVDINEM tuam SERENISSIMAM suppliciter, ac demisse oro: non vt ex tenui munere animi colligat mei tenuitatem; sed vt, quod verissime fieri potest, statuatur; illius tantam esse magnitudinem: vt nec, si etiam amplissimum, maximumq. fuisset; eo genere, quantus ille sit, vnquam potuerit ostendi. Gratū illud tuae CELSITVDINI SERENISSIMAE esse, etsi de re minus grata, libenterq. accipi, vt libentissimo animo offertur, ac dedicatur, vehementer cupio. Vale PRINCEPS SERENISSIME, Principum Italiae decus singulare.

SERENISSIMAE CELSITVDINI TVAE.

*Vnus omnium maxime addictus, deditus,
obstrictusq.*

Her Julianus Monicius.



N S I G N E M certe calamitatem , & incommodum
sane maximum gemitibus , querellis , lamentationi-
bus grauissimis deplorandum nobis attulit , atq.
adeo alijs præterea quamplurimis Illustrissimi , &
Reuerendiſſ. Cardinalis , ALEXANDRI FARNESII,
optimi , clarissimiq. Principis , omni laude sine vlla
exceptione ornati obitus . qui , quo ille maior , quo
insignior ; qui maximus , maximeq. insignis fuit ; eo
gravius , atrociusq. omniū perculit animos , eosdemq.

attonitos magis , magisq. obſtupefactos reddidit : vt magnos , & inopinatos ca-
sus magna semper mentis perturbatio , magna animi commotio solet consequi . O
diem , quo tanto viro huius lucis vsura adempta est , sane acerbissimum . O diem
molestiarum , acrumnarum , & maximorū dolorum , quos propemodum nulla ra-
tio , nulla temporis longinquitas adimat , aut minuat , plenissimum . qui & mul-
tis bonis , iucundisq. reb. quib. , eo viuente , quamplurimi fruebantur , finem im-
posuisti : & iniucundis , ac turbulentis , quae , eo morte ablato , paratae sunt , atq.
adeo imminet ; dedisti principium . Quam infelix , quam trists , quam infestus ,
quam ingratus est aduentus tuus , qui adueniens boni nihil attuleris , sed id boni
potius , quod maximū , amplissimū , & cumulativissimū habebamus , crudeliter ab-
stuleris . dum tantum virum , tantum Principē , tantum Cardinalem eripuisti , vi-
rum optimum , Principem Illustrissimum , Cardinalem amplissimū ; plane nec vi-
ris vllis bonitate ; nec Principib. generis splendore , & nobilitate ; nec Cardina-
libus amplitudine , & gloria cedentem . Sane lugendum , flendum , gemendum .

Nam quem vnus mors ademit , licet aetate prouectum , non puto eius similem
mille annorum spatio repertum iri . Et , si lugeamus , si plurimis lachrymis per-
fundamur , si cuncta querellis impleamus , si nostris maestis vocib. caelum , terra ,
aer , omnia deniq. personent : quis id miretur ? quis reprehendat ? quis obiurget ?
nemo certe , qui nouerit , quanti vir ille pretij , quanti Princeps ponderis , quanti
momenti Cardinalis fuerit , & quā vnus omnium instar esset , cuius nos ad haec
prouocet , incitet , atq. impellat ab omnibus deploranda amissio . Diretur quidem ,
ac nos vehementer , iusteque reprehendat : si , cum caussa non esset , cur ita facere-
mus ; videret tamen , id a nobis immodice prorsus , immoderateque fieri . Vtrumque
enim iusta non caret reprehensione , si , & vbi necessitas fletum non exigit , ibi
fleas : & rursus ibi cesses , vbi vel ratio ipsa ad fletum inuitat . Quae autem po-
test esse iustior , magisq. conueniens caussa , & ratio deflendi ; quam , quod a no-
bis paullo ante maximum , atq. incredibile damnum nullo vnquam tempore , nisi
Deus nos denuo respiciat , resarciendum , sit factum ? quod quotidie magis in po-
sserum sentiemus , & cognoscemus experiendo ; quam dicendo vlla ratione ex-
plicare

plicare possemus. Deum immortalem, quam sunt humana omnia valde incerta? quam eadem valde fluxa, & caduca? quam item infida? Ac, cum haec ita sint, quid caussae est, cur iam ipsi nostram hanc tam infelicem, tamq. miseram nō valde queramus, ac depletemus conditionem? Vix enim ortus est homo, cum statim ad mortem cursum instituit. vix illi aliquid ex sententia, & voluntate euenit; cum illico eius animus ingentibus incipit stimulis angī, & metu discrucari: ne aut id, quod consecutus est, non diuturnum sit futurum, aut ipsi citius etiā, quam ceteris solet natura accidere, vitae munus eripiat. Non enim dici potest, quam multa nos, & grauia ubiq. non solum aperta, & oculis exposita; sed etiā occulta, & quae quis numquam mente, & cogitatione adsequatur; circumstent pericula. Patet id multorum exemplis, qui periculis ijs, quae sunt perpeffi, & rebus aduersis, quas sustinuerunt, admonent: reb. omnibus humanis, & maxime prosperis, ac felicibus hāc dictam esse legem, numquam vt consistent, & firmae, ac stabiles sint: sed mutationem, atq. exitum quodam modo festinanter, ac prope quaerentes; in dies fluant, ac minuantur: nec laetitiam, si quam forte pro sua ipsarum proprietate, & natura afferant; hanc velint cuiquam esse diuturnam. Quam multi enim vix fortuna secundiore fruendi viam sunt ingressi; cum illa, re aliqua eis, quae iter impediat, obiecta, interrumpitur? Multi paullo quidem longius progrediuntur: verum, quo tempore potissimum eis vita opus esset, cū utilitati, & commodo partim suorum, partim etiam aliorum, & plurimum possent, & maxime vellent consulere: tum exoptatissimo, ac maxime necessario vitae munere, atq. vsu priuantur. Nam quo vñquam tempore magis oportuit, Cardinalem viuere; magisq. eius vita, ac tamquam patrociniū fuit necessariū: quam hodie: cū Domus FARNESIA, primis illis praesidijs, quibus firmissime nitebatur, destituta, magna ex parte, tamquam maxima, & fortissima trabe ruinosa moles; eius vnus humeris fulciri, & sustentari videbatur. & tamen tantus vir, tam graui auctoritate, & sapientia, tanta virtute, tam insigni potestate praeditus, ereptus est, atq. e viuis sublatus? Quis igitur non doleat? quis non ingemiscat? quis non queratur? doleant quidem, ingemiscant, & querantur ceteri, quos adspēctus tantum illius conseruare, & memoria recreare poterat. doleant vniuersi, quibus in eo & firmum in aduersis praesidium, & singulare in prosperis ornamentum erat repositum. quis enī non magna sibi ex tanto Principe, & Cardinale tam admirando promississet? poterant multa ex eo sperare etiam ignoti: adeo eius opera patebat omnibus, adeo ad omniū necessitates liberalis eius animus propendebat. At vero noti, & qui erant quasi in eius tutela, quam ipsū, necessitate aliqua oppressi, non frustra adire, & eius opem implorare consueverant? quam facile eius intuitu is, cuius nauis secundo vento ageretur, omnia sibi de commodioris, quo vteretur, cursus securitate spondere; vel, si etiam ageretur, ac fluctuaret aduerso, de incommodioris quoq., quo periclitaretur, liberatione poterat polliceri? Quare merito quidem doleant hi omnes, tamquam nautae, quorum

quorum ex oculis stellae, quarum prospectu navigationis cursum regerent, eua-
 nuerint: vel quorum Naui gubernaculum sit fractum. Sed tamen dole tu, in pri-
 mis, Parma, ingemisce; & voces effunde in dies alias alijs maestiores. Nā vna,
 quae reliqua erat, ex columnis illis tribus magnis, admodumq. firmis, & robu-
 stis; quibus nixa semper fortis, & cōstans stetisti, & floruisti: quibusq. ceterorū,
 qui felicitatem tuam nossent, paene inuidiam paterere; cecidit, corruit; ac peni-
 tus confracta est. At quæ columna? quæ, inquam, columna? illa, illa: qua stante,
 duarum illarum, quæ proxime fractae sunt, quibusq. satis tuta nitebare: ruinā,
 & casum non sentires. Quantum tibi de eo, licet longe abesset, poteras, Parma,
 promittere? quam multa ex eius ope, studio, & auxilio sperare; & sine vlla dubi-
 tatione expectare tibi licebat? non enim consueuerat ille, ac ne poterat quidem,
 cum ab eo tanquā ab vno FARNESIORVM Principum, atq. Heroum maximo pē-
 deres, non de te assidue cogitare. non omnia, quantum viribus humanis fieri pos-
 set, prospera conciliare: vel, si quibus forte tacta fuisses aduersis, vt pro vicissitu-
 dine temporum, & rerum commutatione sit nonnumquam; ea omni cura, cona-
 tu, & studio amouere, expellere, & propulsare. Ille te, si tua tempora laeta, &
 secunda erant, ornabat; ac, prope dixi, felicem reddebat: vel certe, vt laetitia, &
 fortunatus status, in quo eras; maior quodam modo, & iucundior videretur, ef-
 ficiebat. Si etiam turbulenta fuissent, quasi sol clarissimus densas; & obscuras
 nubes dissipans, ac disijciens, omnia discutiebat, animisq. omnium exilaratis,
 quietem exoptatissimam, carissimamq. lucem aduehebat. Et quis tanti viri, tan-
 ti Principis, tanti Cardinalis fultus praesidio, non et haec, & his plura sibi bo-
 na promississet; in quo omnium temporibus inseruiendi, vbi eius requisita fuisset
 opera, par fuit semper cum pari facultate, & potestate coniuncta voluntas?
 Iure igitur optimo ALEXANDRI FARNESII cū summi Principis, tū Amplissimi
 Cardinalis interitu, qui ita natus, ita in omni vita cōparatus fuit; vt plura sem-
 per re praestaret, quam quis vnumquam votis, atq. animo concipere esset ausus:
 quiq. iam optima quaq. re, & christiana, & Deo in primis, atq. hominibus gra-
 ta exercenda, omnes eodem studio occupatos longe post se reliquisset: iure, in-
 quam, tanto damno luget Parma, luget Placentia, luget Roma ipsa, lugent vr-
 bes reliquae, oppida, atq. alia, quaecunq. vel eis fuerunt subiecta; vel etiam alicui
 e fratribus, Principibus; vt nouimus, atq. experti sumus, & egregijs, & plane
 omni re, vel viro, vel Principe, addo etiam egregio viro, & eximio Principe
 digna, insignibus. Et qui temperent a lachrymis? qui fletum cohibeant? qui miti-
 gent dolorem? qui Cardinalem, tantum virum, tanq. singularem Principem no-
 uerunt? qui eius clementiam, qui facilitatem, qui iustitiam, qui humanitatem, qui
 prudentiam experti sunt? qui incredibilem in ea, quæ ad Dei honorem pertinet,
 munificentiam, qui inauditam in Christi pauperes liberalitatem cognouerunt?
 qui cetera omnia laudanda, atq. extollenda, quæ in eo cumulatissime, atq. cum
 omnium admiratione exstiterunt, ornamenta, vel obseruauerunt, vel de ijs, quibus

ea obſervare; ac præſentibus intueri licuit; audiuerūt? quin etiam, qui non, ſi
vñquam, nunc maxime lachrymis, ſletui, dolori laxent habenas: cum intelligāt,
hominem cum mortem oppetiuiſſe, cuius nec ſuperior actus ſimilem viderit,
nec ſit fortasſe etiam viſura poſterior; Ex quo aperte omnes conſiteri, palamq.
prædicare poſſumus; cum tantis hiſce, tamq. diuinis fuerit virtutibus ornatus;
recte, ac prorsus laudabiliter, nec ſine occulto Dei conſilio, & voluntate factū
fuiſſe; vt ætatis initio fuerit in ſacrū Cardinaliū Collegiū coopatus ab Auo ſel.
mem. PAVLLO III. Pontifice, vt ſupremi honoris gradu, ſūmo, ita rebus maxi-
mis, & præclarisſimis in Pontificatu geſtis vere Summo, quē haec FARNESIO-
RVM familia hodie oñum, quæ in toto Orbe nobilitatis ergo ſummis laudibus ce-
lebrentur, Illuſtriſſima; ac prope iam extra Orbis terminos cognita, & cantata,
immortalis gloriæ, & nominis, quod nulla omnino temporum longinquitas de-
leat; habet auctorem. Atq., id ab eo ita eſſe factum, licet opinari. quod, quæ
erat, præter ceteros, ingenij ſagacitate, qua animi ſolertia, prouideret, fore: vt
ea toto vitæ ſuæ tempore præſtaret, quæ ceteris magnam excitarent admira-
tionem: ei, viuenti, benivolentiam omnium conciliarent: vita functio gloriā ad-
ſciſcerent immortalē. Quæ omnia ita prorsus cūcenerunt. Nam cum pro ſummo
ſplendore generis numquam alia cum animo ſuo cūluerit, ac meditatus ſit;
quam, quæ eius Nobilitati reſponderent, quæ maius, atq. Illuſtrius nihil eſſe
poterat: tamen multo magis ea ſemper in mente illius verſata eſt cogitatio, vbi
vidit, cum maxima Nobilitate iam maximam eſſe coniunctam dignitatem: atq.
ex ornamento tam admirabili ſtimulos ſibi ad optima quæq. cogitanda, & eſſi-
cienda additos eſſe acriores. Itaq. eam tantam, & tam grauem ita ſuſtinuit per-
ſonam: ita præclare, ita laudabiliter in omni re, quam ratio ipſa ab eo poſcebat,
ſeſe pro tam ſublīmi honoris gradu ſemper habuit: vt quod Pontifex ipſe vel
ſibi, vel alijs de conſilij ſui euentu in tanta ei, tamq. honorifica dignitate con-
credenda promiſſet: is diligētiffime ſemper, feliciffimeq. præſtiterit. is enim pla-
ne fuit; ea bonorum morum forma perpolitus; eo laudabilium inſtitutorum gene-
re decoratus: ſic ſuas omnes in omni vita inſtituit, atq. ordinauit actiones: vt
eius nec mens vñquam a recto Sum. Pont. conſilio aberrarit: nec ab optima ra-
tione, & inſtitutione actio deflexerit. quæ ratio agendi, quæ vitæ, ac morum
conſtantia eiufmodi in eo fuerunt: vt laude licet ampliffima, & cumulatiſſima
celebrentur, ac commendentur: non tamen ea vñquam meritorum illius magni-
tudinem, & excellentiam poſſit adæquare. Atq. hoc ita ab eo factum fuiſſe,
probant, quibus ſumma cum gloria ſemper; nec mediocri cum honore interfuit,
ſacra Conſiſtoria, quæ quinquaginta, & quattuor annorum ſpatio a pluribus
ſummis Pontificibus ampliffimisq. & omni laude florentiſſimis Cardinalibus,
vt variarum, & magnarum rerum neceſſitas tulit, habita, & celebrata fuerunt.
Porro in his totidem annos, atq. eo etiam amplius verſatus eſt, & quidem ita:
vt in eo munere obeundo, & in ijs præſtandis, quæ ab eo, pro magnitudine eius
perſonæ

personae exigebantur, excelluerit semper inter omnes, qui aderāt: nec vñquam, qua erat prudentia, & iudicio praeditus: qua commoditate omnia agebat: alicui dederit secus de se, quam oportuit, suspicandi, aut loquendi occasionem. Quod cū ita sit, cui est, aut ēt esse potest dubiū, quin magni aestimauerit is, qui nulla in re fallitur, aut falli potest, Deus; cum ibi tandiu esse; & ijs, quae ibidem agerētur, interesse: sic, ut in Augustissimo illo loco nihil prorsus, nisi eo praesente, tractaretur, ac decerneretur? Hoc enim, vt plane, quod sentio, aperiam: diuinitus factum arbitror fuisse. Atq. in hanc sententiam ea adducor ratione, quod temporis spatium, quo dignitatem illam supremam proximam sustineret, atq. administraret; video illi multo longius fuisse concessum; quam legatur, cuiquam ex eo ordine vlla fuisse aetate contributum. Eminebat autem ibi, & si qui aderant, quorum valde cutesceret prudentia in ijs prouidendis, quae ratio negotiorum requiret: hos facile, vel superabat, vel adaequabat. si in genere etiam responsorum, & in sententia apte, accommodateq. dicenda excelluissent: vt scimus, ac saepe videmus, alios alia re praestantes: nihil eis concedebat. si aliud quidpiam vt ageretur, necessitas postulasset: is erat, qui ceteros, si qui forte discrepassent, ac dissensissent: nullo negotio ad meliorem posset trāducere sententiam. adeo vel natura vel industria, vsu, cōsuetudine insignis, vel omnibus potius, quae paucorum laus est, eximius, praestans, planeq. singularis exstitit. Et, vt ne dubitetur, quidquā, nec de hoc genere, nec de ceteris, perquam multis, quae de eo praecipue dici possunt; facit id, quod notius multo est, magisq. constat inter omnes, qualis, quantumq. fuerit, in omni re, quae Principe, quae Cardinalē, quae summo Principe, quae maximo, atq. amplissimo Cardinalē erat digna; quam vt nunc ad ea declaranda, atq. adeo ad explicanda omnia, quae insignia in eo, & maxime illustria, atq. admiranda fuerunt, cuiusquam opus sit oratione. Vbi enim facta clarissima atq. apertissima sunt, ibi qua ratione potest esse, qua illa ostendantur, oratio necessaria? Haec quaerantur ab ijs, qui, in vita dum essent, nihil ipsi sibi, vñ de ceteris cognoscerentur, quacsiuerunt: memoria eorum celeberrimis, magnoq. opere laudandis rebus ad nullam hominum aetatem propagata.

CARDINALI FARNESIO verbis, & praedicatione nostra, aut alterius, quo partes eae admodum insignes, ac perhonorificae illustrentur, quibus in vita mirae, alundeque exornatus fuit, non est opus illis ipsis rebus, quas excellenti cum laude, & vna omnium approbatione gessit, cum mirifice prodentibus, & nomen egregium, ac singularem famam passim per orbem terrarum quotidie magis ac magis diuulgantibus, atq. aeternitati consecrantibus. Vt enim clarissimae solis luci nihil addas; si, dum magis fulget, ac splendet; per exiguum aliquid, quo cum indices, lumen proferas: cum solis lux tanta sit, vt & perse splendeat, & omnia, quae adiiciantur, lumina longe sit superatura. & propemodum obscuratura: Sic quae egit Cardinalis sane multa, vel potius innumera, eo vsq. praecelara, & illustria fuerunt, atq. adeo sunt; vt ad omnium an-

res, & notitiam, non solum qui aderant, sed etiam qui eum numquam de facie
nouerant, quam facillime sua ipsorum virtute, & clarissimo splendore, nullo ora-
tionis a quoquam adluta lumine peruenerint, adeoq. eorum mouerint animos, ut
omnes admiratione obstupefacti videantur. Et hoc quidem tempore in toto or-
be terrarum (non oratorie, sed vere loquor) nullus est, qui magis, quam CAR-
DINALIS FAENESIVS cognoscatur, ametur, colatur: ac cuius nomen, &
virtus, quam illius, vel magis in animis hominum habitet, vel frequentius eisdē
in ore versetur. Vix sol oriens sua admiranda luce, & splendore, omnia statim
illustrante citius in Oriente cernitur; quam Cardinalis, re aliqua maiore peracta,
nusquam non cognoscebatur, re ipsa eius nomen, & laudem quocumq. terrarum
illico deferente. Nam quidquid agebat, non humile, & abiectum; non obscurum
& vile; non contemptum, & ignobile: sed amplum, et insigne; illustre, et magnū;
suspiciendum, & nobile semper fuit. Itaq. quoties in publicis occupabatur mu-
neribus tantum ea, quam magno cum decore semper, & omnium admiratione
sustinuit, persona dignis, talis fuit: vt omnibus esset admirandus, suspiciendus,
& omni excellentissimae, ac praestantissimae laudis genere celebrandus. Qualis
etiam plane exstitit in legationibus illis honorificentissimis, quas obiit non se-
mel ad Imperatores, ad Reges, & ad alios huiusmodi Principes supremi hono-
ris sibi a Summ. Pont. commissas. at quo Pōtif. ? PAVLLO III. Auo quidē eius,
qui certe ad honorandum eum, quia erat propinquus, facile natura propende-
bat: sed eodem tamen sapientissimo viro, qui, nisi, pro eo, quo mirifice excellebat,
iudicio cognouisset, quae ad eas res necessaria erat, illi inesse virtutem: numquā
commississet; vt honorem, qui virtuti dandus erat, propinquitati dedisse videret-
tur. Nouerat enim in maximis, & grauissimis huiusmodi muneribus man-
dandis non propinquitatem, aut aliam priuatam affectionem esse attendendam:
sed eius, qui ad agendum aliquid deligitur, personae merita spectanda, & prae-
claras, atq. honorificas partes obseruandas. In his autem legationibus quomo-
do se se tractauerit, quanta cum laude, atq. admiratione Regum, Imperatorum,
ad quos missus erat, & aliorum, qui forte ibi adfuissent, summorum virorum,
omnia peregerit: vix vlla quamlibet grauis, & plena, ad eam rem omni ex par-
te docendam satis futura est oratio. Ego quidem non dubito, quin horum omnium
futura sit aeterna memoria; eamq. gloria, & laus, quae semper floreat, omnemq.
posteritatem adaequet, consequatur. Et, cū insigni esset, vt nemo nescit, nobilitate;
si quis alius in Italia, atq. etiam extra Italiam eo nomine censetur: cū gra-
dum proximum a summo Pontificatu obtinuerit: cum ceteris virtutibus, quae
eum decebant, multisq. praeterea alijs, propeq. infinitis laudibus esset apprime
ornatus, & insignitus: quid de litterarum scientia, quid de praeclararum artium
cognitione dicemus? quod, cum a vitae probitate, & morum sanctitate discesse-
ris, decus alterum est, & idem, vt nemo non confitetur, singulare? An has ei de-
fuisse, & ceterarum liberalium artium, quibus eius dignitas, & maxima nobi-
litas

litas decoraretur, scientia eum caruisse credemus? Ego vero haud patiar mihi persuaderi, noluisse eum ceteris, quibus abundabat, hoc quoq. praestantissimum addi ornamentum. non enim me fugit, ac ne ceteris quidem, opinor, obscurum est: eum voluisse semper, virorum virtute insigniter praeditorum Aulam suam esse vel Domicilium, vel Receptaculum. ita ut tales viros cum reciperet, non posset ipse non eorum, & esse quam simillimus, & consuetudinem vehementer expectere. NAM facile hominum animos, ut morum, ita etiam studiorum similitudo coniungit. Hos autem adeo habuit caros, adeo fouit; ut, si quae ei in dies offerebantur occasiones, quibus eos pro meritis ornare posset; haud umquam passus sit; eas sibi e manibus vel a ceteris eripi, vel negligentia etiam sua effluere. sed, quod virtuti omnia deberi sciebat, alios Episcopali dignitate insigniendos, alios ad Cardinalatus fastigium prouehendos, alios alijs honoribus meritorum rationi, ac magnitudini paribus exornandos curauerit. Virtute ipse non mediocriter praeditus, quos nouerat, ea egregie excultos horum se Patronum, Educatores, Altorem, Patrem, & cum deniq. cuius ope, & adminiculo illi tamquam manu prehensi, ad dignitates, ad gradus, ad honores promouerentur, volebat esse: sic, ut haec quoq. ceteris eius laudibus, quae certe plurimae, & maximae sunt, non immerito sit adijcienda, sicut nec silentio illud fas est inuolui: Collegijs, ubi optima optimae indolis adolescētium ingenia ad spem perfectae eruditionis, & profectus in praestantissimis quibusq., ac liberali homine dignis artibus alerētur, eum fuisse Praefectum: & non paucos suis sumptibus in eis educandos, atq. erudiendos diligentissime curasse. Nec certe in ceteris, quae priuatim ad alicuius commodum a se fieri possent requisitus, minus enituit. nec sane est, quamobrem cuiquam ea de re dubitare, veniat in mentem. Nam in omni vita aeque haec, quae ad priuatam alicuius utilitatem pertinerent, atq. illa, in quibus cōmunis, & publicae utilitatis ratio inesset, illi magnae curae fuerunt. nimirum existimanti id, quod res est, non, ut sua tantummodo commoda sequeretur; tantam illam, tam grauem, tam illustrem, tanta auctoritate munitam sibi ab Auo, Summo Pontifice, diuini numinis impulsu, & tributam dignitatem, & impositam fuisse personam: sed, ut aliorum etiam quoad liceret, & cōsuleret commodis, & necessitatibus inseruiret. quae vna, & praecipua ratio, ac caussa est; cur Deus in rebus humanis voluerit esse Principes. Non enim suarū modo debent, ceteris neglectis, rerum studiose esse; sed aditi, & rogati, ad necessitates etiam eorum, qui rebus aduersis vrgentur, ac premuntur, subleuandas, quatenus pro dignitate id illis facere liceat, oculos inflectere, & animum conuertere. Secus, quod fuit Dei consilium, quod idem spectauit, dum illis imperium, potestatem, seu principatum tribueret, vel committeret dignitatem: id non videtur vllō modo effici. quae res an in grauissimā recidat, ac redūdet Dei offensionē. nemo est tam caecus, quin videat; tam hebes, quin nesciat; tam excors, quin intelligat. Quod ut optime intellexit Cardinalis; ita optime etiam exsecutus est, Plane ut eius erat, qui Dei munera

muncra vellet, a se recte, fideliterq. administrari. Quis enim umquam, aliqua necessitate coactus, ad eum adiit opem imploraturus, qui non eius admirandam senserit, atq. expertus sit humanitatem? qui non facilitatem suscepit? qui non iam, quod optavit, consecutus; iustitiam, & aequitatem perhonorifica laude sit prosecutus? Hic ego quam facile possem multos enumerare, & quodam modo in medium proferre, qui, cum ad eum accessissent, rei alicuius ab eo, vel ab alio, eius opera, obtinendae causa: ita recesserunt; ut occasionem praedicandae, atq. extollendae benignitatis nacti, haud umquam laudibus ei tribuentis finem imposuerunt. Verum ego hic neminem commemorabo: nullius nomen exprimam, quod & nimis longum id esset: & si tantum nuda eorum nomina exponantur, ei muneri tota oratione non sim satisfactorius. cum interim eos putem, qui penes eum oia benigna, & copiosa cognoverunt; non esse partes officij sui in memoria benignitatis conseruanda neglecturos; ac, quod secundo loco ab eis exigitur, qui alicuius beneficijs sunt, saltem eorum commemoratione, & praedicatione gratum, memoremq. animum in omni vita ostensuros, ac testaturos. Quod quidem eo magis facere, eos conuenit: quo minus etiam sperare debent; se plurimis, & maximis eius meritis posse eo pacto satisfacere: ne dum, ut confidant, futurum fuisse; ut, si adhuc vitae vsura frueretur, beneficiorum illius amplitudinem, & animi magnitudinem, omni beneficio maiorem, gratia referenda, adsequerentur. Sed haec multo sunt minora, multoq. pauciora; quam, quae pro ratione eorum, quae honorifice admodum, glorioseq. egit, essent dicenda. Quamquam quid est causae, cur ego plura conari debeam? cum si tantum rerum capita mihi exprimenda proposuissem; vix integer dies vnus, itemq. alter ad ea complectenda sit satis futurus. quod efficit, longe ut sim ab ea mente, mihi ut persuadeam; fore meam, uel alterius orationem, etiā si plenior illa sit; tantam, ac tam copiosam: ut eius rebus commemorandis, atq. explicandis; & laudibus, quae ei propterea debentur, celebrandis, ea par sit futura. nam quo plura explicantur; plura superesse videntur, explicanda. Itaq. ego & obruior multitudine, & magnitudine obstupeasco, quarum illa animum, & memoriam, haec omnem, quamlibet vberem, & plenam, longe magno intervallo, dicendi superat copiam. Vir enim ille vere Amplissimus agendo identidem multa potius omnibus praecepit, quam cuiquam praebuit, ea quantumuis longa oratione persequendi facultatem. Quare dicam, quod mihi sine ulla, vel inuidia, vel reprehensione videtur de eo dici posse. Obiisse, dum ille obiit, generis humani Patronum, quando suum nemini, quantum quidem fas ei fuisset, denegabat patrociniū. Obiisse seculi nostri gloriam. nec a me hoc gratiae causa, verum merito, verissimeq; dictum fuisse, putatote. Quis enim eiusdem amplissimi, ac numquam satis digne, satisq. pro meritorum ratione laudati ordinis, cuius ille pars maxima, & diu, & singulari cum laude semper fuit; non idem sentiat? quis non idem ingenuè confiteatur? quis eundem tam multa tanta animi alacritate praestantem, & effi-

efficientem; nec ab officio huiusmodi, vlla vnquam, vel defatigatione retardatū, vel deterritum difficultate non suspiciat? non admiretur? non concelebre? *Au-* sūm dicere, ex summis Pontificib. ex Imperatorib. ex Regib. ex Ducib. itemq; ex alijs valde insignibus viris vix vnum exstitisse, qui laude, qui gloria, qui hominum caritate, & beneuolentia, qui nominis celebritate, & fama eum adaequauerit. Ego quidem, vere vt dicam, neminem noui; qui eo, multis ab hinc annis, gloria, qui honore fuerit instructior; ac, quod ad id genus attinet dignitatis, qua ornatus erat, vel potius cui ipse ornamento erat, uixerit omni laude cumulatio-
Atq. haec omnia testantur multae partim infimorum, & mediocrium; partim in primis Illustrissimorum virorum familiae: quae, grauissimo eius casu audito, dolore ingenti, sensibus intimis ob eam rem affectae sunt. vt certe mira tantae personae condicio, ac status ferebat. atq. id quidem, quotidiano, & vsitato vestitu abiecto, statimq. lugubri, qualis tali tēpore sumi solet, assumpto; macrore, & luctu obsitae, significarūt. Testatur Parma, cui ex re tā tristi luctus longe, quā alijs vnquā, accidit maior. Testatur idē, opinor, quib. decet signis, Placētia. Testatur vrbs Roma, quae nullius vnquam, vel ciuis optimi, vel carissimi filij, vel quauis dignitate praesulgentis viri morte, maiorē, ac diuturniorē ostendit maestitiam, nec lachrymas effudit, ac sparsit copiosiores. Testantur etiam permultae ciuitates, quae ea de causā eodē modo affectae, luctum sibi indixerunt. Testatur Italia tota, quae tantam iacturam grauissime tulit. Testatur demum Orbis terrarum paene uniuersus, qui, eo e viuis sublato, conterritus modo quodam, consternatusq. est. Prope est, vt dicam: *FARNESIAE* domus, dum ille obi-
bat, extinctum esse lumen; quo antea clarius nihil erat: & splendorem, quo nihil illustrius, obscuratum. Tantum saepenumero in vnius viri vita, & aucto-
ritate momenti, tantum ponderis est positum. Sed, qui rebus consulit humanis, Deus, is, ne id penitus eueniat incommodum, satis mature prouidit; estq. in omni aetate, vt infinitae illius sapientiae visum fuerit, prouisurus. Scimus enim, cum ita gerere omnia; itaq. eadem administrare; vt numquam fallatur. errare quidem humana possunt iudicia; vt certe saepissime errant. at idem nec vllō modo in Deū cadere; nec de eodem vllō pacto dici potest. coepit ille Domum hanc diligere, quod iam non semel signis minime paucis, usq. non vulgaribus ostendit: minime etiam dubitandum est, quin eodem amore, eodemq. constantia adhuc eandem foueat, quidquid incommodi quattuor annorum spatio, passus sit, euenire. Ac, quare minus dubitem, quin ita sit futurum, ea est causā, quod non video, quidquam eiusmodi esse commissum, vt hāc ideo perpetuae obliuioni tradere debeat; aut prorsus velit abijcere. contra potius plurima sine intermissione fieri, animaduerto: cur eam extollendam, atq. ad omnem aeternitatem felicissime prouehendam, existimem. Quare non est, non est, inquam, eam despecturus, aut abie-
cturus. sed potius in dies effecturus maiorē, et ad maiora puecturus. video enim, eius ductu *ALEXANDRYM* hodie Ducem nostrū, Ducis OCTAVII, proxime vita functi,

functi, sed perpetua memoria digni, qui CARDINALIS frater erat; filium, PHILIPPI REGIS HISPANIARVM nomine bello, quod contra hostes nominis christiani, duodecim iam annos, & aliquanto amplius geritur; Praefectum Generalem, praestantissimum sane, & inuictissimum ijs, quae pro catholica fide ad hanc vsq. diem felicissime gessit, eo iam esse prouectum; vt ei ad immortalem gloriam nihil desit. Quae res fidem facit, planeq. confirmat, breuifore; vt ad id decus, eumq. honorem perueniat; quo inuidiam superet: atq. eodem ceteris, non solum perueniendi; sed etiam adspirandi spes adimatur. Quae omnia nemo ambiguum potest, aut debet habere; quod ei exploratissimum est, quodq. confitetur; a Praepotenti Deo ei esse concessa. cui, vt semper antea, ita etiam hodie addictissimus, ea in primis refert accepta. Video etiam, Ducis filium, RAINVTIUM, Principem nostrum: vbi ipsi quoq. par animo, quem maximum gerit, oblata fuerit occasio: non generis suo quam illusterrimo fore dissimilem, sed omnino esse, quae Patrem, quae Auos, quae Proauos referant; Deo cum vocante, ac promouente, quamplurima editurum. idq. ita esse facturum; vt non eorum gloria contentus, nouam ipse sibi gloriam, eximiam, atq. omnium hominum memoriam adsecuturam, sua cuiq. suorum relictâ, comparet, atq. adipiscatur. Quin etiam Principis frater, ODOARDVS, quae se digna sunt, futurum est; vt Dei instinctu, & intelligat; & cum iâ intellexerit, eodē nunquam eum deserente, exsequatur. Auita, paterna, fraterna, sed in primis FARNESII CARDINALIS gloria eius animo continenter obuersante: eundemq., vt Themistoclem Miltiadis trophæa quiescere non sinebant, dies, noctesq. excitante. tādē vt, quem amissum gemimus, se ipsum nobis alterum ei parem, consimilem, geminum reddat, efficiatq. vt nos eū, quasi rediunū, intuentes; omni macrore, luctuq. absterfo; perfecta quadā, atq. omni ex parte cumulata laetitia perfundamur. Sed, vt ad rem redeā; ceteris tantum damnum vel suum, vel aliorum lugentibus, &, propemodum dixi, Generis humani delicias sublatas deplorantibus: an existimandū est, interim Collegium illud sacrum Cardinalium, quod, ab eo semel tantum ornatus, ipse quotidie plus plusq. ornabat; tanti incommodi, & maximi luctus expers fuisse? non ita: sed contra potius, maximum illi luctum eius morte, & grauissimum contigisse detrimentum; existimandum est. Nam sunt quidem in Sacrosancto illo Coetu, qui nulla non optima re excellent, quamplurimi. ita vt, siue probitatem quaeras, non desint, qui probitate praesent: siue aequitatem, & iustitiam velis; iustiores fortasse, & aequiores illis nusquam reperias: siue prudentiam, quae humanae vitae dux est; & omnium, quae agunt homines, certissima, & numquam fallens regula, cupias; siue doctrinam, sapientiam, & quae-cunque nobilissimo hoīe, atq. illustrissimo viro digna sunt, malis: videas ibi viros tantos, ac tales, vt ijs alios rebus hisce maiores, ac praestantiores, non facile vsquam nancisci queas. Sed tamen cum tales, tātiq. sint, qui ordinē illum, omni laude cumulatum, obtinent: qualem tandem, quantumq. virum fas est dicere,

Cardi-

Cardinalem fuisse? cui semper ab illis primas datus fuisse, non ignoramus? non est, quod quisquam id neget. alioqui non decrit numerus paene innumerabilis sapientum hominum, qui eum impudentissimi mendacij coarguant. Fuit enim is inter tot, tamq. excellentes, & maxime insignes viros, laudem omnem vincētes; tamquam Coryphaeus. ita vt Collegium illud Sanctum tantum perdidisse dici possit, cum graui morbo absumptum Cardinalem vidit, quantum perderet Mundus, si, quem inter Naturalia omnia maximum habet, & maxime necessarium, solem ipsum perderet. Vt enim ille inter pulcherrima quae plurima, Dei manu facta, habet Mundus; pulcherrimus apparet, ac cernitur, omnium, qui verū sensum habent; mentem, atq. animum ad sui admirationem vehementer excitans, ac transducens: sic Cardinalis, nemine vel verbis refragante, vel iudicio animi dissentiente, inter omnes, quotquot, & qualescunq; essent, in loco illo perhonorifico ac perillustri, pro multiplici eorum genere, quibus natura cum, industria adhibita, insigniuit; laudem omnium maximam obtinebat. qui etiam ijs, quae iam adeptus erat, illustrissimis ornamentis non contentus; plura in dies singulos adipisci, & cumulatis cumulum addere conabatur. Nihil veritus, ne ea omnia, in quibus laudis seges, ac materia esset, se se non essent dignissima. & eo magis iudicaretur de bona mente, animoq. ad ea mire propenso, quae personae, quam sustinebat, responderent: si se ipse frequentem, & assiduum in omni honestarum, & laudandarum rerum genere praeslisset, ac praebuisset. Itaq. hoc praeclare admodum, magna q. constantia fecit. vt iam nihil supersit aliud, cum omnibus ijs, quae mirificam illius nobilitatem, vere in toto Orbe singularem, decerent, abunde esset ornatus; nisi vt, quae magis sunt laudanda, magisq. exercenda; itemq. nobis, vbi hinc Dei iussu pie migrauerimus, valde profutura: in ijs etiam incredibili studio, & christiana pietate elaboraret. Ea autem cum multa sint, duo tamen mihi esse videntur maxima, atq. omnium maxime necessaria. quam doctrinam a Christo domino traditam, ex Euangelio habemus, primum vt ipsi in ijs frequentiores simus, solliciteq. ac magna cura versemur, quae potissimum ad Dei amorem, & ad eius cultum pertinent augendum, & amplificandum. deinde ad proximi utilitatē, quae spectant, ac referuntur; haec, vt ex eo ipso Euangelio habetur, numquam negligamus. sed accurate, diligēterq. efficiamus. inquit enim: Diliges Dominū Deū tuū ex toto, etc. & Proximum tuū sicut te ipsum. Duo haec, qui veluti scalarū gradus sunt omnium primi, & maximi; quibus in Coelum nos peruenire vult Deus, quā studiosē? quā propensē? quā pie? quam demum ardentē? ac continentur, ad supremū vsq. vitae diem excoluit? Haec, & si non sunt, qui ignorent, ita nota, ita illustra, ita omnibus perspecta, ac cognita sunt: tamen, quia, quae grata sunt, aliquando etiam, & iucunde solent commemorari, & cōmemorata libenter, & cum voluptate audiri: non grauabor de his quoq. aliquid dicere. ne forte, quae sunt ceteris praestantiora, a nobis, quod nibili ea putauerimus, praetermissa fuisse videantur. Quam valde igitur sanctam, quam laudabile,

tile, quam vtile consilium? quamq. idem praeter cetera commendandum, cum
a. i. eo adiecit, vt templum societatis IESV Collegio suo vnus acre, nemine
in. partem, & consociationem sumptus, qui infinitus erat, admissos; construendum,
& exaedificandum curaret. at cuiusmodi templum? Magnificentissimum sane, atq.
amplissimum. quo nō solum in tota Vrbe Roma, ac prope etiam in toto orbe ma-
gnificentius, illustrius, atq. operosius aliud non cernas; sed ne mente, quidem
atq. animo, diligenti etiam, atq. assidua cogitatione adhibita, cōplectare. Quid?
audacter dixerim, quod in Coelo collocaretur, dignissimum. Porro quis satis digne
v. m. quam, vel rem tantam laudet, vel incredibilem eius in Deum, quae eum im-
pulsit, pietatem non dico, verbis exprimat; sed vel animo comprehendere, vel
suspensione attingere possit? qui, licet opus illud eiusmodi esset, quod ex eius
Aerario identidem magnam pecuniae vim promi, postularet: numquam ta-
men v. llo, quamuis ingenti, sumptu est deterritus; quo minus rem, dum ad
v. mbilicum, quod dicitur, esset perducta, prosequeretur. Et quis hoc prae-
ter CARDINALEM FARNESIVM fecisset? hominem tanto magis,
propter Deum ad effundendas pecunias alacrem, & impigrum; quanto magis. ple-
riq., qui, quia, quae Dei sunt, non percipiunt; ad easdem colligendas, vel natura
propendent, vel ita insatiabili quadam cupiditate impelluntur; vt saepe toti pe-
nitentia ea re obruti, ac demersi ius fasq. aspernentur: Deū ipsum contemnāt: suā
ipsorū salutē pro nihilo putent. nec tamē auaritiā ipsi suā v. m. quā exsaturēt. fa-
cilis enim mare, si exhaustū sit, aqua impleas; quā auarorū pecuniae cogēdae,
qua flagrāt, expleas cupiditatē, et eorū dē, qua laborāt, sitim exstinguas. Quare
sunt quidem permulti supra, quam dici possit, diuites, & pecuniosi, pecuniarum
aceruos, & cumulos quotidie acervis, cumulisq. maioribus augentes. dū et diui-
tiarū copia aurā captant popularē, & ea ratione in animis mortalium immorta-
le nomen suum reddere conantur. ita autem pecuniam collocantes; vt appareat,
quam de Dei gloria fuerint solliciti; quod talium virorum vnum maxime debe-
ret esse studium, vbi sunt? nam his diebus profecto vbiq. terrarum videmus
huiusmodi esse quam paucissimos. Perijt, perijt, atq. extincta est, quod non sine
aliqua, vel, vt rectius loquar, magna animi mei commotione dico: perijt, inquam,
summa illa Pietas in Deum, qua olim vigente, ex Christianis hominibus, qui
tunc vivebant, non pauci reperiiebantur; qui hoc idem, quod a Cardinali factū
est, quamlibentissime facerent; atq. id quidem multo alacrius, multo promptius,
quam alia, ex quibus nec ad Deum bonos, nec ad se certa vlla, & solida posset
utilitas permanere. Adeo erant illius temporis christiani, quam, qui nostra
hac tempestate sunt, religiosiores, & diuini cultus longe studiosiores. Sed non
huius, verum illius aetatis putauit Cardinalis homines, qui Deum ita coluis-
sent, ac venerati essent; sibi esse imitandos: eodemq. tempore alijs praebendum
exemplum, diuitias, si his sorte abundant, ante, quam vitae munus expleue-
rint, gloriose, atq. vtiliter collocandi. Nā quid tandem vtilius? quid gloriosius,
quam

quam, quae à Deo abunde accepta sunt: haec ad Dei honorem hoc pacto conferre, ac suppeditare? Sed hoc studium, quo incensus Cardinalis priscae aetatis christianos in opere tam laudabili imitatus est, hodie in eorum animis, ut proxime annui, qui opibus abundant, videtur esse exstinctum. Cum tamen, si necessaria sit pecunia, quae ad alia efficienda subministretur; quam, quae ad Dei venerationem pertineant; saepe tanta eius vis, ac magnitudo solita sit expendi; ut res illa apud plerosque magna non careat admiratione, & non raro is, qui eam ita insumit, dedecus aliquod, & hominis parum sapientis nomen, quod sane grauissimum est, non effugiat. Quo magis mihi in hoc genere videtur admirandus, & summo opere laudandus Cardinalis: quod, quo tempore, quaque aetate alij magis inhiant diuitijs congregandis, augendis, conservandis: quod praesentia tantum, quaeque oculis videntur, ament, suspiciant, amplectantur, de futuro nihil solliciti: ille tum cogitabat, quae sibi esset carum ad Dei honorem, & gloriam impendendarum ineunda ratio. O bonam mentem CARDINALIS FARNESII. O animum eiusdem vere sapientem. O consilium longe sane omnium optimum in primisque laudabile, addo etiam vtilissimum, & tali Principe, tanto Cardinali, vera, ac perfecta in Deum pietate imbuto, dignissimum. Eant nunc, qui sapientia tantum humana praediti, sibi, de suis temerarijs consilijs, & factis, plus quam stultis placentes, ac blandientes pecunias vitae, labori, periculis numquam parcentes, coaceruant, maximis maiores: nec, quātae cumque fiant quotidie earum accessiones, vniquam eorum nimis auida expletur, atque exsatiatur cupiditas. Eant, qui in vanas res, easque nimis inutiles assauium fortunas suas effundunt, dissipant, disperdunt. Deum immortalem, quantum eorum stultitiam, atque insipientiam valde sapiens, valdeque laudabile CARDINALIS FARNESII opt. mem. factum coarguit, quam leues eos, quam dementes esse ostendit? Recte hic, quid praeceperit CHRISTVS Dominus, exquisiuit. Rectius, quod ab eo praeceptum est, observauit. Rectissime, quod prohibuit, summo studio euitauit. Prohibuit autem condi thesauros, sed in terra condi, prohibuit, ubi nulla eorum potest esse securitas. Verum in coelo eosdem reponi, non prohibuit, immo vero, dum id vetuit fieri, hoc cuique, quod fieri vellet, aperte mandauit. Quid enim melius? quid tutius? quid, quod & apud homines maiorem, & magis veram laudem, & apud Deum certiorem, & magis tutam afferat vtilitatem? nam non est haec, quam alij parum sapientes sequuntur, vera ratio augendi diuitias, & census cumulandi: ut opes semper reconditae, semper occultae habeantur: nec ad vllum necessarium, atque honestum usum, quacumque re seu causa postulante, proferantur: sed ea, quā hic vix praeter ceteros, praesertim temporibus his vel excogitauit; vel etiam in usum, cum olim valde visitata temporum iniuria, & hominum prauitate, ab usu recessisset; sapientissime reuocauit. ut eis ad haec, & ad alia huiusmodi faciēda vteretur. Nouit iam ille, & reapse experitur: quam sapienter, atque ita, ut christia-

num hominem, eundemq. dignitate praecellentem, atq. opibus redundantem decebat, ipse sibi consuluerit, quod hac, quam secutus est, eas ita collocandi delectatus sit ratione. nouit nunc optime, bona omnia non, si hac, & alijs huiusmodi pijs rebus expenderentur; sed, si non ita expenderentur, plane peritura. Reuera enim diuitiae, si conseruantur, pereunt; si ita impenduntur, fructum proferunt, multo copiosiore, atq. vberiore; quam bene cultis, & subactis agris, comendatae segetes, proferre, & progignere vel possint, vel soleant. Hoc enim Cardinalis, cum pro ea singulari, qua praeditus erat, prudentia cognosceret; & qua munitus erat, fide christiana, crederet: nihil habuit carius, nihil antiquius; quam, ut eas & in his, & in eleemosynis pauperum CHRISTI consumeret. ut, cum, tanto opere construendo, se Deum diligere, & cultus illius studiosissimum esse, atq. in eo loco summam quotidie Deo immortalis venerationem adhiberi cupere ostendisset: Proximi etiam amorem, quod e duobus diuinis mandatis, alterum erat; magnae sibi curae esse, non verbis, sed re ipsa demonstraret. Qua quidem re quid se, qui tantus nobilitate, tantus dignitate, tantus diuitijs erat, quid christiano homine poterat dignius facere? Nam, cum tam multa sint, quibus nos pro excellentia, & dignitate christianae huiusce professionis, curam, & studium impendere oporteat; habemus vna cum ceteris, quae sunt nobis imperata, de eleemosyna quoq., qua Proximi inopis necessitati, & penuriae subuenitur; singulare praeceptum. quam, qui non exercent, cum facultatum vis, id fieri, patitur: primum inhumani sunt: deinde parum etiam Euangelij praeceptis obtemperant. ex quo hanc habemus doctrinam; ut, cum Deum dilexerimus, idq. re ipsa, factisq. ostenderimus: quod libentissime, splendidissimeq. Cardinale fecisse, constat: mox ad Proximi amorem, qui ipse quoq. si plene, perfecteque. velimus legem obseruare, necessarius est; animum adijciamus: & bona etiam nostra ad eius usum, ubi haec aliqua postulauerit necessitas, conferamus. A quo praecepto qui recedunt, ut probris, odio, & omni vituperatione, atq. improbatione sunt digni: sic, qui ei pro facultatibus parere student, in magna sunt apud Deum, & homines laude ponendi: nec sine causa in magna, dixi, eos laude esse ponendos. etenim, quod homines omnium maxime solent amare, & in quo possidendo, retinendo, & conseruando magis conquiescunt; sic, ut non facile velint aliquid ex aceruo vel urgente necessitate diminutum, vel imperante charitate detractum: in eo potissimum ipsi sibi, nescio quo modo, vim inferunt. Quod incundo, atq. hilari animo fecisse Cardinalem, ubi opem suam summæ CHRISTI pauperum egestati necessariam esse intellexit; oēs vno ore praedicant, & res ipsa plane indicat. Audite, quae so, quod non factum alias legitur, in quo titubet fides: sed oculis ipsis, qui sunt certissimi testes, multi viderunt. Nam ex Aerario suo, pecuniam eleemosynae nomine non tenuiter, non parce, non mediocriter; sed large, copiose, & abundanter promi, ac distribui iussit. quippe quattuor millia scutorum quibusdam incredibili inopia oppressis, non diuersis temporibus, verum

vno tempore , vnoq. actu . quod quidem notissimum , ac celeberrimum est .
 Hoc quia rarum est factu , magnum fortasse multis , ac prope incredibile vi-
 deatur: sed non magnū Cardinali, nec incredibile de eo fertur; qui non angustum,
 sed amplissimum; non avarum, sed liberalissimum; non sordidum , sed munificen-
 tissimum habebat animum, pietatem in Deum , & charitatem erga proximum:
 maiorem hominum iudicio complectentem. Magnum videatur ijs, qui diuina, to-
 to animo in diuitijs, & pecunia quodam modo sepulti , non intelligunt ; nec co-
 gitant . Cardinalis vt pote qui iam diu vnam Dei gloriam in omni re specta-
 bat, vnamq. animo habebat propositam , quiq. Dei amore incensus inflamma-
 tusq. erat, parua haec, & minima ducebat : maioribus quotidie animo designa-
 tis. Nec mirum eam fuisse illius mentem . Etenim QVAE non amanti licet le-
 uia, & facilia factu; grauiam tamen, & difficilia sunt: eadem amanti, vt cunq. gra-
 uia, ac difficilia ; leuia tamen, & facilia videntur . Quare hoc vnum singulari
 quodam studio, & mira animi propensione agebat quotidie . Atq. in hoc quidē
 genere cum non haberet, quicum certaret: & quem, vt cupiebat , certando su-
 peraret. iam ipse secum huius tam magnificae, gloriosaeq. rei certamen institue-
 rat. vt quae posterioribus temporibus faceret; haec ijs, quae prioribus fecisset ,
 vellet semper esse maiora . Nam hoc quoq. obsecro, adhuc de eo magis mirum,
 & aeterna memoria dignum cognoscite: quod a morte illius scitum , & cognitū
 est, & ab vrbe Roma egressum, iam passim cum ingenti Dei honore, & Cardi-
 nalis laude commemoratum, celebratum, ac dissipatum: Eum Dei amore impul-
 sum, semel decem millia scutorum, Xenodochij cuiusdam extremae inopiae vt
 subueniret, dinumerari voluisse . Sic , sic agebat Cardinalis. sic ipse se se exer-
 cebat. ita in CHRISTI vinea laborabat . ita a CHRISTO quod libera-
 lissime, cumulatissimeq. acceperat; CHRISTO item ipsi liberaliter, cumula-
 teq. reddebat . Sed an putatis fortasse christianam illius pietatem, & sum-
 mum eiusdem summopere ad hoc genus propensum studium , intra huius ,
 quam proxime dixi, pecuniae numerosissimae quasi terminos, ac cācellos potuif-
 se se se continere? nolite, nolite id putare. vt enim , qui alicui nefario scelcri se se
 dediderunt, non semel, sed pro t̄a incredibili , qua ad illud impelluntur , ac ra-
 piuntur cupiditate, saepius id committunt: sic, qui virtutem, quā colat, & qua
 oīum maxime delectetur, vnam ex animo, vereq. complexus est; in ea exercē-
 da, atq. excolenda numquam defatigatur : sed, quo est illius actio frequentior ,
 ac crebrior: eo desiderium eius excolendae maius accenditur . Itaq. putauit, se
 quod vero christiano, & nomine suo celeberrimo dignum erat, minus facturū ,
 si sibi tam angustos huius tam christiani , tam sancti , tam diuini operis , quo
 CHRISTVS in pauperibus suis alitur, fines praescripisset. Quocirca non ea
 pecuniae magnitudine in pauperes eleemosynae ergo diuisae, quae numerum
 quattuor millium scutorum adaequaret; non ea, quae decem millia complecte-
 retur; ipse sibi, animoq. suo studium christianae pietatis assidue meditantī satis-

fecit. Sed multa etiam millia scutorum cum ad alia pia op̄era, tum ad redimendos captivos, qui in Turcarum, aut aliarum barbararum gentium potestate detinebantur, non grauate contulit. idem illud etiam, quo tempore grauissime aegrotabat, secum ipse constanter facere cogitās; si vitae spatium ei adhuc paullo longius fuisset concessum. Sed nec ista, tanta, tamq. ampla, liberalitate vsus conuenit, non ita se tamquam circumscriptum tulit; verum extra terminos hōīe egressus est, animo eius pro sua magnitudine, atq. amplitudine quotidie ad his maiora, atq. ampliora aspirante. Nam non desunt, qui graui oratione affirmant, ac testentur: eum commiseratione erga pauperes vsq. eo affectu fuisse; cum eos extrema quaeq. patientes animaduiceret; quorum se habitu CHRISTVS latitarum dixerat; vt scutorum triginta millia ex suis redditibus in eorū vsus singulis annis diuidi, ac distribui voluerit. Qua humanitate, si hominem respicias; vel pietate, si Deum attēdas; vel commiseratione, si proximum egentē species; non videas, quid maius, quid splendidius, quid honorificentius dici, aut excogitari possit. Nec mirum, cum liberalitas virtus sit omnium excellentissima, partim quod moralis est, cuiusmodi in primis homine digna est; partim diuina, quod de illa ab omnibus quidem, sed praesertim a diuitibus excreēda à Deo praeceptum habeatur. & recte, nimirum, quod efficiat; vt ad Dei similitudinem, eum hoc genere imitantes, proxime accedere possimus. nam ex illis duobus, quibus philosophi nos, tamquam deos mortales effici posse ostenderunt, hoc unum est, vt bona nostra cum alijs, quam liberalissime fieri potest, communicemus. nō enim dubium est, quin ex ea re liceat nobis quamplurima in hac ipsa vita sperare, & expectare a Deo immortali. ac, quin etiam fas sit, cum breuissimam vitae huius peribolum clausurimus; vitam illam beatissimam, ac felicissimā adipisci, non sinunt nos euangelica promissa, certissimis quibusq. rebus certiora, dubitare. Quod cum prae oculis assidue haberet Cardinalis, non opes tantum suas, sed vitam millies si opus fuisset, pro Dei honore, & gloria profudisset. Hac tam admirabili munificentia nesciō, an maius aliquid nascentis Ecclesiae initio, vel ijs etiam, quae proxime secuta sunt, temporibus legatur a magnis illis viris factum fuisse. quibus, quod impigre Dei consilij, & voluntati obtemperarent; nihil prius erat cultu assiduo virtutum christianarum. Patet D. Gregorium, magnum illum Pontificem, quotidie aluisse pauperes; idem D. Ludouicum, Gallorum Regem, fecitasse, notum est. Legimus praeterea alios eadem ratione, & studio mirum in modum fuisse delectatos. Sed, si respiciamus, ac perpendamus, quod Cardinalis faciebat, eum huiusmodi genere rerum, magnis illis viris nō inferiorē fuisse, statuemus. Quam ob causam satis cōstare potest. nemini mirū videri debere, si Roma vniuersa, si Parma, si Placentia, si Italia tota mortē eius ita defleuit, ita est maerore paene immoderato prosecuta: si, (dicā, quod mihi videtur, vcre dici posse) fere cunctus Orbis in maestitiā, & luctū, quod de hac vita tātus vir, tam bonus, tam pius, tā misericors decesserit, est trāsductus, atq.

conucr-

conuersus; si, vt ad ea, quae Romae facta sunt veniam; Pauperes, quorum assidue inopiam, plura in diem elargiendo subleuabat, querulas, & maestae, dum funus efferebatur, voces edebant facile ad fletum, & ad complorationem non homines solum, humanitatis participes; sed muta etiam, & vniuersa ab humano sensu, & iudicio aliena pronocaturas, dum saepius haec verba: Heu Pater pauperum perijt; Heu perijt pater pauperum, & alia his non dissimilia, clara, & queribunda voce repetendo copiosissimas lachrymas, & singultus quam creberrimos sibi, itemq. alijs, qui aderant, funus prosequentes excitabant. aderant autem, & prosequiebantur tam multi, ordinis non solum infimi; sed etiam supremi; non ignobiles modo, & plebei; sed nobilissimi, atq. illustrissimi; iijq. tam densi, tam crebri, tam frequentes; vt nulla aetate, nulla memoria hominum rei alicuius vel maestae, & lugubris; vel lactae, & iucundae euentu, a condita Urbe quidquam simile factum, aut auditum fuisse permulti admodum fide digni, magna asseueratione affirmant. Quod nos quoq., si Annales legerimus, absq. dubio certius, planiusq. cognoscemus. Quamobrem, cum talis vita, tam honesta, tam virtutibus exulta, tam demum christiana ei summae curae fuerit; cum tales ab eo tam mirificae, tam laudabiles Dei, & hominum oculis vehementer probatae, ad extremum vsq. vitae diem sint exercitae virtutes; cumq. ecclesiasticis sacramentis, quibus morituri christiani muniuntur, rite munitus, & Summ. Pontif. benedictione per vnum Cardinalem e maioribus auctus, diem suum obierit: quid? nonne pie credere debemus, cum ita hinc quasi ex angusto carcere discessisse, ita humana haec reliquisse; vt iam in amplissimum illum aeterni regni locum Dei consensu, & voluntate ingressus, diuinum illud praemium, christianis eius non paucis, & multo maximis factis diuina lege debitum, felicissime sit consecutus? vt, quos, pijs huiusmodi rebus agendis, secutus est: coniunctim cum illis aeterna illa felicitate, & felici aeternitate perfruatur? Pare est enim, cum in gloria sempiterna vna cum illis consociari, qui se se ab eisdem in rebus, factisq. christianis, dum hic vixeret, non dissociavit. Hoc autem ei ita feliciter euenisse, mihi quidem valde sit verisimile. quia Deus, vt scelera vlceatur; sic cum is sit, qui numquam passus fuerit, sibi a quoquam gratis inferni; recte, & ad honorem eius quae facta sunt, praemiorum etiam maiorum, quam, quae illa promerita sint, non patitur esse expertia. Quod, si hic magno amissus est dolore, iam non debet esse cuiquam dubium, quin eo magna admissus sit iucunditate: & si nos hic degentes relinquens tristitia affecit; at in coelum ingressus, acuo beato fruente laetitia repleuit. vt in patriam rediens peregrinus ijs, qui in patria viuunt, propinquis, amicis, & alijs summum gaudium solet asferre. Qua propter satis iam luximus: lachrymis satis indulgemus: & m. rito sane, homine tanti splendoris, tanti honoris, a quo tot, tanta, ac

tam

tam varia ad omnes commoda, atq. emolumenta manabant, amisso. Sed, quando recte persuasum omnes habemus, id non culpa fortunae, non casu, non sorte; sed Dei voluntate factum esse. cuius mos est, ut hominum commodis semper, & maxime piorum, consulat; est profecto, quomobrem iam gaudemus: praesertim cum praeclare iam cum eo sit actum. qui nunc demum, ut credimus, Portum illi securus teneat, quo nauim suam, ut sapiens Gubernator, vita hac dum frueretur, semper direxit. ne, si ultra forte, quam par est, & ratio praescribit, luctum eius caussa protrahamus, ac prorogemus; non tam aliud quiduis, quod magni aestimemus, lugere; quam, quod ita agendo, &, quo more christiani solent, moriendo consecutus est; summum bonum ei inuidere videamur.

D I X I.



ANDREAE GUIDETI

de Herculiano Monicio .

CARMEN.

DIVVS ALEXANDRVM calamo num scribit Homerus?
Aut qui se superans, arma virumq. canit?
An illi? quorum commota est curia verbis,
Graecia quos plures, Romaq. sancta tulit?
Non etenim. Herois doctissimus Herculianus
Sermone hoc laudes exprimit innumeras!
Magnum magna decent. magno laudandus ab ore
Magnus ALEXANDER nomine, maior ope.

IN AMPLISSIMI CARDINALIS

FARNESII obitum eiusdem Andreae

Guideti . Carmen.

PURPUREI sanctiq. patris quis dicere laudes
Carminis vel posset concelebrare decus?
Nam, dum trans metas virtutem ingentibus actis
Extendir, videas claudere vocis iter.
Qui candore animi vertentes egerit annos,
Et lance aequarit dissona corda pari.
Purpureos monerit Tyrio velatus amictu
Pectore maturo munia obire Patres
Ante graui in luctu quam totum linqueret orbem:
Et sedes caperet sanctior aethereas.
Quem maestae ad Tybris deflerunt flumina Nymphae
Roma nec ornatas dilaniata comas.
Et qui succrescunt gemini, cariq. nepotes,
Atrati assidue clamq. palamq. dolent.
Vberibusq. oculis lacrymarum flumina mittunt,
Illacrymant patrum decubuisse senem.
Cuius facta cluent, operosaq. gloria rerum,
Quae manet, atq. auidos effugit vna rogos.

Fletib.

Fletib. auxit aquas, amisso maesta parente
 PARMA suas, tundens pectora nuda manu.
 Antiquum ingeminans luctum, duplicansq. dolorem,
 Vulnere adhuc veteri pectore sub tacito.
 Effudit lacrymas, qua clarum surgit eoo
 Littus ad occiduum, dissona turba pias.
 Et quicumq. animum, studio vincente laborem,
 Virtute exornat Palladis auxilio.
 Sastentaui aquas, cursus compressit equorum.
 Rex Ponti, & toto proluit amne rogam
 Sacra cohors Phoebe cineres collegit, & ossa
 Aurato, mirum, condere visa cado.

F I N I S.



P A R M A E.

Cum licentia Superiorum.

